

China pertahan kenyataan Najib MH370 berakhir di Lautan Hindi
Malaysian Insider
2 Apr, 2014
Oleh Elizabeth Zachariah

China mempertahankan pengumuman Perdana Menteri Malaysia Datuk Seri Najib Razak berkenaan pesawat Malaysia Airlines MH370 "tamat" di selatan Lautan Hindi dengan mengatakan Najib memilih perkataan itu bagi mengelakkan situasi tidak diinginkan kepada keluarga penumpang dan mereka di atas pesawat.

Duta China ke Malaysia, Huang Huikang berkata Najib memilih perkataan itu dengan berhati-hati namun ia disalah tafsir oleh pihak lain.

"Apa yang PM katakan sangat penting bagi kami namun ia mencetuskan kontroversi.

"Sesetengah orang melihatnya sebagai pesawat itu hilang, atau terhempas tanpa ada yang terselamat," katanya.

Bagaimanapun, duta itu berkata perkataan "tamat" itu mengandungi pelbagai kemungkinan untuk membantu misi mencari dan menyelamat.

"Pencarian diperincikan daripada kawasan koridor utara dan selatan kepada kawasan selatan dari koridor selatan.

"Tujuan memilih perkataan itu daripada perkataan lain adalah bagi mengelakkan maksud yang merbahaya," katanya.

Kebanyakan keluarga penumpang China masih menaruh harapan pesawat berkenaan dirampas dan ahli keluarga mereka masih terselamat.

"Namun jika perkataan 'terhempas' digunakan secara terbuka, ia menggambarkan tiada penumpang yang terselamat.

"Janganlah kita fokus kepada perkataan semata-mata, kita perlu mengalih perhatian kepada misi pencarian yang masih berjalan untuk mencari pesawat itu," katanya.

Misi pencarian yang memasuki hari ke-26 bagaimanapun masih tidak menemukan sebarang serpihan pesawat yang hilang ketika dalam perjalanan dari Kuala Lumpur ke Beijing pada 8 Mac itu.

Huang bagaimanapun mengakui terdapat sedikit masalah dalam kerjasama termasuk maklumat bercanggah, namun ia dapat diselesaikan segera.

"Tiada yang sempurna, lebih-lebih lagi insiden ini tidak dijangka dan sedikit kelemahan boleh difahami," katanya. - 2 April, 2014.

mh370-berakhir-di-lautan-hindi